

أزمة مشاعر

نصوص عامية

نجاح علي

الطبعة الأولى

2020 م - 1442 هـ

ديوان العرب

للنشر والتوزيع



عنوان الكتاب: أزمة مشاعر

اسم المؤلف: نجاح علي

التصنيف الأدبي: نصوص عامية

رقم الإيداع: 2020 / 22505

الترقيم الدولي: 1 - 35 - 6749 - 977 - 978

التدقيق اللغوي: د. هبة ماردين

تصميم الغلاف: الفنانة ناهد تاج

رقم الطبعة: الطبعة الأولى

التنسيق الداخلي: د. محمد وجيه

المدير العام: د. فادية محمد هندومة



دار ديوان العرب للنشر والتوزيع - مصر - بورسعيد

جوال: 00201211132879

البريد الإلكتروني: mohamedhamdy217217@gmail.com

حقوق الطبع والنشر لهذا المصنف محفوظة للمؤلف، ولا يجوز بأي صورة إعادة النشر الكلي أو الجزئي، أو نسخه أو تصويره أو ترجمته أو الاقتباس منه، أو تحويله رقمياً وإتاحته عبر شبكة الإنترنت، إلا بإذن كتابي مسبق من المؤلف أو الناشر.




أزمة مشاعر

نصوص عامية

نجاح علي





إِهْدَاء

إلى كل أحبابي

أحبابي فقط...

من التمسوا لي الأعذار دون شرح أو مبررات

إلى من قدروا حبي وعطائي وغفروا لي الذلات

إلى من استمروا معي برغم المحن والعثرات

إلى من أقاموا بداخلي سداً منيعاً لمقاومة الإحباطات

إلى من ساهموا في بناء جسر من الود وبادلوني التقدير والإحترام

إليهم فقط أهدي هذه الكلمات

وأقولها بصدق

لولا أنتم ما كنت أنا...

نجاح علي

المقدمة

حينما تتبعثر المشاعر
يصبح الإنسان كريشة في مهب الريح
تتأرجح به الدنيا
يشعر أحياناً أنه كالطائر يغرد في السماء
ثم ينتكس وتصيبه خيبات الأمل
فيمضي باكياً منغمساً في بحور الظلمات
وفي الحالتين نقابل أناساً يشبهون الأقمار التي تضيء في الليالي الظلماء
وآخرين يشوهون معالم الطريق
ويسعون لهدم البناء
كلُّ منهم ترك فينا بصمات لا ينساها التاريخ
وتخلدها الذكريات

مات الإحساس

قيدت صوابي لهم شموع

مانابني منهم غير الدموع

يفيد بإيه ثاني العتاب

استحالة يكون في رجوع

عملت خدي لهم مداس

داسوا على قلبي

اغتالوا روحي

واتبدل الإحساس

دموع

دموع على طرف العين سايلة

على دنيا غدارة

كل حاجة فيها للسقوط آيلة

نجوم السما بعدت

والإيد ليها مش طايلة

خاتم في صباغك

في ناس طول
ما هي محتاجة ليك
يبقوا زي الخاتم
في الصباغ
أول ما يستغنوا عنك
يسببوا لك الأوجاع
تلاكيك ع الفاضي والمليان
وأروح منك فين يا صدا
أحنا كنا لسه أمبارح
سمن سايح وعسل
بسرعة كدة اتبدل القناع

معقول في كدة
كل يوم تسوء الأوضاع
عجبي عليك يا زمن
القوالب نامت
والأنصاف قامت
الخصيس بقاله مكان
والغالي هو اللي اتباع

كان فاكِر

كان فاكِر لما اشوفه
هاجري وأنادي عليه
كان فاكِر قلبي
لسة ييميل إليه
كان بيحسب إن عيني
هاتفرح لما تلاقيه
طيب لما هو كدة
كان بيغدر بيا ليه
كدة ولا كدة
الغدر في طبعه
مش هابكي ثاني عليه

فاكرني

فاكرني خلاص كرهتك

وإني ممكن أشتيت فيك

والله ربي يعلم

محبتتي واشتياقي ليك

بعدك عني حرق قلبي

خلاني أدعي عليك

عشان ماتكونش لحد غيري

وأشوفه بعيني ماسك إيديك

هجرك ليا خلاني

أقول كلام ماكان في بالي

في يوم أقوله عليك

المسامح كريم

سامح مرة في حياتك
ماتنساش إننا أخوات
اخرج من دايرة نفسك
دي الحياة خد وهات
ماتنساش في الرحمة
الرحيل وهادم اللذات
أوقف مع نفسك وقفة
غير طور ابحت عن الذات

عالج نفسك بنفسك
أوعى تستسلم للاحتباطات
قاوم كل النزوات
تنجى نفسك من المهلكات

الدم بقي مية

ياخويا يا ابن أُمي وأبويا
فاكر لما جيت تسند عليا
شديت ضهري وسندتك
بكل ما عندي وروح قوية
أما احتجت لك أنا
وجيت أفسند عليك
لاقيت الدم بقي مية
ياخويا
ياالقمة هنية جمعتنا
بأب وأم وفرحتنا

وحياة العيش والملح

الي كان مالي بيتنا

أنا قلبي منك شايل

مش هاعد عليك الجمایل

هاقطع الجوابات والرسايل

الي كنت ناوي أبعثهم وأعاتبك

يا بوقلب جاحد يا أنا في

ده أنا لوروحى هاتطلع

وأنفاسي تتقطع

ما أمد إيدي لك تاني

لو كل الناس ماتت

ما فضلش فيه غيرك

أفضل أموت عطشان
وأموت سجين القضبان
وليلي ونهاري أعاني
الناس بتقولي
أخواتك فين
وأنت الشيال الحمال
طول السنين
قولت راحوا في الطوفان
أو دهسهم القطر بالقضبان
لو الدم مش لاقى
عروق يمشي فيها
أومال هايجري فين

جفت ينابيع قلوبهم؟
ولاصابهم العمى في العين؟
بكراً الزمن يدور
والي عندي يروح ليهم
ده أمره بين الكاف والنون

ساعة المصالح

ساعة المصالح النفوس بتتصالح

والوجوه بتكون مكشوفة

مجرد ما تنتهي المصالح

ترجع الأقنعة بالغش معروفة

زيف وتزييف وخداع

وحجج واهية وقصص مألوفة

نفوس ضعيفة تدريك ظهرها

بعد ما كانت عليك ملهوفة

احذفهم من حياتك

من غير أعذار ولا تعليل

برعوا وتفننوا في الوصول

لما كشفتم الأيام

ظهروا على حقيقتهم

واعتزلوا التمثيل

سابق في دلاله

ياسيدي ليه بتحرمننا منك
واحنا بنتمنى ننول الرضا
بندور عليك ونسأل
بقا يعجبك كدة
خلاص بقينا
مانقدرش على بعاذك
عينينا عليك متعودة
خليت الناس يلومونا
ونسמע كلام من ده وده

كفة الميزان

على وشك بيان

يا نداغ اللبان

الدنيا ليه اتقتل خيرها

واتقلبت كفة الميزان

قليل الأصل نافش ريشه

وعامل نفسه دونجوان

بدلة شيك

عربية فخمة

لكن ولو بردو معروف

إنه خسيس وجبان

ابن الأصول للشهامة عنوان

تقوم عليه القيامة
وهو الي يتهان
الي يحزن أن الناس عارفاه
لما يشوفوه يضربوا له تعظيم سلام
لحد إمتى يا دنيا
المحترم آخر الصف...
وقليل الأصل قدام؟!
يارب زيح الغمة
وتنعدل كفة الميزان

لاوي بوزه

كفاية عليك تكشير

كفاية لوي بوز

هاتعيش على طول كدة

بعيد ومنبوز

هاتفضل كدة خسران

عمرك في يوم ماتفوز

ده حب الناس ثروة

أغلى بكتير من الكنوز

ليه تبعد عنهم

الي يجوز عليهم

عليك كمان هاجوز

بين إيديك

بين إيديك تضيق

معالم الطريق

تتوه سفني

في البحار

بين إيديك أقعد

على رصيف قطارك

تذوب روحي

وسط مرارة الانتظار

بين إيديك
تتوه ملامحي
وسط الزحام
وأنتظر سقوط الأمطار

آخر كلام

عديت بحور وقولت
يمكن ألاقيك ع الشط مستنيني
في قلب البحر بغرق
ما قادر تمد أيدك تعديني
هافضل على طول أحبك
ونار بعادك تكويني
هاقول للمركب تعاود
هاقتل شوقي وحنيني
هاقول لقلبي براحتك
انتهى الي بينك وبينني
بعدي عنك راحة

لو كان قربك ها يحيني
ها خلع قلبي من صدري
وبرجلي أدوس عليه
أنا عمري مانحي ولا أتطاطي
إلا لي خلقي
وأحسن تكويني

حظي معاك

حتى يوم فرحي مبكيني
وف عز مانا فرحانة
مجري الدمع من عيني
والناس بتبارك نجاحي
حاساها تعزيني
وكل يوم أسال نفسي
أنا إيه مخليني
باقية على حبك
وأنت عمرك ماكنت شاريني
ولا فكرت مرة بعد الغدر
تصالحني وترضيني

كل ما أشوفك أفتكرك

وأكره أيامي وسنيني

وأندم على كل لحظة

مرت ما بينك وبينني

وأنت جنبي

وأنت جنبي

بشوف الفرحة

في كل الكون

وأنت جنبي

بشوف البسمة

في أي عيون

وأنت جنبي

بحس بنبض

قلب حنون

وأنت جنبي

الورد يرقص

على الغصون
وأنت جنبي
أي صعب يهون
ولما بشوفك
ألاقي الدنيا فرحانة
لابسة جديد في جديد
لما بشوفك
والإيد في الإيد
أحس الفرحة مابقتش بعيد
لما أشوفك
بلاقي الدنيا وردية
وأعيش عمر جديد
وأنت جنبي

بلمس النجوم بإيديا

بعيش لحظات

حلوة وهنية

وأنت جنبي

بنسى الحزن والقسية

وتجري الدموع في عينيا

من خوفي..

لا بكرة تنساني

ومابقاش في النية

وصلني سلامك

وصلني النهاردة سلامك

هداني وطمني عليك

حسيت بإيدي لمست إيديك

صحيت الشوق جوايا

وغيرت ظني فيك

وبعد ما كنت حاقسى

رجعت تاني أحن ليك

وازاي حبيبي أنسى

وتهون عليا نظرة عينيك

بس أوعى تجرح مشاعري

أو تبعد ثاني عني

وأفضل أنادي ..

وأعيش العمر أقولهالك

بجبك حبيبي

أيه اللي حصل

أيه الي حصل يابشر

العقل ليه غاب

جرايم كل يوم مابين

قتل وسرقة واغتصاب

الدنيا ليه بقت غابة

والناس ملاحمها

وحوش وذئاب

انتهاك لحقوق الطفولة

واغتصاب فتيات

في ريعان الشباب

بأي ذنب بتقتل

فيها البراءة والعذرية
بأي حق تاخذ منها
وبعين قوية
ولا عاملين للآخرة أي حساب

خيرنا عليهم

ياللي ناوي تضرنا
وتدوس على حلمنا
أوعى تنسى أصلك
كنت عايش في عزنا
كل الي شاغلك
تشتت شملنا
وتزرع الحزن في قلبنا
وتهبط عزمنا
والله احنا عنك في غنى
بكثرة هايجمعنا مكان
أنا وأنت

وساعتها نعرف
مين أنت ومين أنا
كله ع المكشوف بيان
وتشوف أصلك من أصلنا

متهم بريء

ياما جوة السجون
ناس كتير مظلومة
عائشين مجروحين
من الكلمة الحلوة محرومة
قضايا بتتلفق
وسجلي يا حكومة
قرايب وجيران
ولاد خال وعمومة
ما بين المحاكم
والناس حوالهم ملمومة



والي ظلموهم

الرحمة في قلوبهم معدومة

نسيوا أنهم

يتموا أطفال

نسيوا دعوة المظلوم

والي ربنا عنها قال:

"وعزتي وجلالي لأنصرنك ولو بعد حين"

ما فيش شيء محال

وربك بالمرصاد

هو الي يخفف هموم

فوق الصبر والاحتمال

ارمي حمولك على الله

وفوض أمرك إليه

مادام الرب عادل

احنا في إيدينا إيه

الحل قدام عينينا

ورايحين ننده عليه

أيام زمان

زمان البيوت

كانت ضلمة

العتمة قائمة

ما فيهاش نور

أهالينا ساكنين العشش

وعيشتهم أحلى

من الي سكنوا قصور

البركة كانت بالوفرة

واللمة كانت أحلى

والود كان موصول

الي عندك عندهم

والمليان يكب ع الفاضي
وجبر الخواطر في كل الأمور
الله ع الي كان
يدخل عليهم
الفرح والسرور
يقيدوا الشموع
ويقيموا الأفراح
يهنوا بعضهم
وبأيديهم يبنوا
للود جسور
كرم الضيافة أساسهم
والغريب عندهم مجبور
يوم العيد تيجي الفرحة

راحة قلوبهم
ف زيارة القبور
عاشتهم بسيطة وهادية
لا فيها كبر ولا غرور
النية جواهر صافية
لا يحبوا شهرة ولا ظهور
عاشوا ع الفطرة
كل حياتهم
وغادروا الدنيا
وربنا أحسن مثواهم
في كل الأمور

أمانه عليك يا بكرة

أمانه عليك يا بكرة

أوعى عني تغيب

وخلي عندك فكرة

إني حاقابل أحلى حبيب

يالالا يا ساعات عدي

وخلي الشمس تغيب

ييجي الصبح من بدري

ويكون لي لقانصيب

في رؤيا نور الحبيب

يفرح قلبي برؤياه
وتحضن روحه روحي
يعيش قلبي هناء
ويداوي كل جروحي

من يوم ما قابلتك

من يوم ما قابلتك
ولا عارف أصحى
ولا عارف أنام
كل ما يهرب
تفكيرى منك
ألاقيك معايا
في الأحلام
لا قادر أقاوم حبك
ولا قادر ع الاستسلام
سيرتك معايا دائماً
وحواليك كل الكلام

في عيوني الغرام
لا عارف أداري وأخي
مشاعرك في قلبي ابتسام
وحتى لو تهجر وتبعد
كفايا عليا السلام
أطمئن على حالك وأسألك
عاملة إيه ...
معاك الأيام؟؟

مش هتنازل ثاني

أنا اتنازلت كتير
والدور بقى على حضرتك
تضحي عشائي ولو مرة
وتثبت حسن نيتك
تختار ما بيني وما بين
كل البنات الي حبيتك
مش حارضى أبداً
يكون لي شريك
في القلب يقاسمني محبتك
أنا ممكن أمشي من الطريق
وأسيبك ثاني للوعتك

يالا قرر وقولي
مين حاتبقى في عصمتك
أنا وحدي ولا....
كل البنات على ذمتك
ساعتها أروح المحكمة
قدام القاضي وأحلفك
ولو في واحدة تانية
غيري تأنس وحدتك
يبقى بالمعروف نفترق
وبلاش أعطل حضرتك

العوازل

العوازل غاروا مني واشتكوني
شافوني قابلتك بيلوموني
وقالولي عليك كلام غريب
بيقولوا إنك مالکش حبيب
بتحب كل شوية
مالکش في الطيب نصيب
العوازل غاروا مني واشتكوني
عايزين يبعدوني عنك ويحرموني
كل ما أداري عنهم يجويكلموني
يجيبوا في سيرتك ويمنعوني

لكن خلاص أخذت قرارى

خلاص حددت مصيرى

علشان خلاص...

مش قادرة أقاوم

أنت ليه ؟؟

أنت ليه عايز تبيع وما تشترش ؟

أنت ليه عايزني أحبك وما تحبنيش

عايزني أجيلك وما تحبنيش

أنت ليه كده على المحبة ماتبقيش ؟

ولو قلت بجدك تقولي ماتكديش

ليه دائماً ماتصدقنيش

وكل ما أسأل تقول مافيش

كل ما أقرب تقول ماتحاوليش

لو مش عايزني قول وسبني

سبني أعيش

وإن سألتك عن حاجة تاني....

ما تقوليش

كنت فاكراك

كنت فاكراك

حاتقدر انشغالي بيبك

حتفرح لما تشوفني بعنيك

أتاريك غدار..

بتبيع الي بيشترك

كنت فاكرة..

إن خضوعي ليك يرضيك

إن كلامي بلسم يداويك

أتاريك ...

أناني ..

والغالي بيهون عليك

كنت فاكراك

حاتجيني لما أناديك

وأنا المشتاق للياليك

أتاريك ظالم...

خبيت أمني فيك

ياخسارة حلمي

الي ضيعته بإيديك

ياخسارة دمعي

الي بكيته عليك

وكل لحظة فاتت

وقلبي الي علقته بيبك

لكن لا..

لا هعاتبك ولا أشتكيك

حاسيبك للزمن هو كفيل بيبك

خلص الكلام

خلص الكلام وانتهى
الي ليكم جوابا مات
أعلنت عليكم عصياني
بأيدي قتلت الذكريات
هاعيش زماني من غيركم
هاعوض بنفسي الي فات
أنا ياما ضحيت عشانكم
قدمت كثير تنازلات
وخدي عملته ليكم مداس
غدركم فاق كل التوقعات
محيت صوركم من بروازي

وبقيتم بالنسبه لي ..

ريشة في مهب الريح

وحطيت أرقامكم

في سلة المهملات

أمل

عدي مجزئك لأخر الشط
افرد شرع الأمل بإيدك
ارسم حروفك بأجمل خط
خلي الحزن ينسانا ومن
ابتسامتنا ينشال وينحط
اقهره دوس على أسبابه
عمره في يوم مايعاود قط

اشغل نفسك بنفسك

عجباً لمن ينتقد الناس

وهو العايب المعيوب

فاكر نفسه مثالي

ولا خالي من العيوب

عايشها بالطول بالعرض

فاكر الكفن له جيوب

مش سايب أي ذكرى

حلوة جوة القلوب

عدت عليه فرص كتير

لجل ما يرجع ويتوب

ناكر الجميل حالف

مايرجع عن الذنوب

يارب بحق رجوع

يوسف لسيدنا يعقوب

نور بصيرته واهديه

أنت الغفار لمن يتوب

ليه الناس

ليه الناس ماتحبش
الصراحة والوضوح
مع أني بحبهم
وقلبي كتاب مفتوح
أقدم لهم الخير
يدوسوا هم ع الجروح
ناجيتك ياربي
وشكيتلك بما أَلَمَّ بي
وبسرهم عمري ما أبوح

ساعات نحس بالفرح

ساعات نحس بالفرح
يرفعنا للسمازي النسور
أوقات اليأس يقتلنا
نفر فر ونسقط صرعى
في بطن الوديان والبحور

العمر عدى

العمر زي القطر
ييعدي ويفوت
والدنيا زي الساقية
بتحكمنا بريموت
كل يوم نقول بكرة أحلى
لابكرة بيجي وأدينا منتظرين
في أي لحظة نموت

السلام عليهم

سلامٌ لمن التمسوا لنا
الأعذار في الشدة والأزمات
باتوا سهرانين الليل
يدعولنا بفك الكربات
ينسجوا من العتمة
أكاليل الزهور وينثروها
في كل الطرقات
ياخذوا أيدي وأتخطى
بهم المحن والعقبات
ينوروا طريقي بالشموع
ويرسلوا أجمل الباقات

لهم مني أجمل تحية
أقطف من بستانك لهم
أجمل الوردات والقبلات

دعوة للتفاؤل

مهما تضيق بك الدنيا
اتسلح بالصبر والحلم
ولا تصحى في يوم ندمان
وخلي بالك ما حدث بينفع
لو نمت يوم متعكر وغضبان
وبأيديك امسح دموعك
وداري عن الي فيك شمتان
وبص لبكرة بابتسام
وانسى الماضي والأحزان
عيش السعادة بمعانيها
حتى لو كانت أحلام

يمكن تتحقق بكرة

وتعيش في أمن وسلام

وانهض وابدأ بنفسك

مفيش مكان لكسلان

وحقق يلا أهدافك

وانشر الخير في كل مكان

وحب كل الناس

هتعيش أسعد إنسان

دموع حزينه

ليه يا دموعي ليه؟
مش راضية تفارقي عيني
هو فراقه صعب
ولا ده وعد بينك وبينني
لو كان بأيدي ما كنت أسيبه
ولا كان النوم يجافيني
والسهر يبقى صاحبي
وما فيش حد يواسيني
مات حي جوايا
من يوم ما راح
وساب جوايا ألم وبراخ

لو كان قدر جي له
ما كان عمل كده فيا
يمكن كان القدر يسعدنا
لو صبر واستنى شوية

دموع الندم

أمي سامحيني واطلبي لي
العفو والغفران
أنا أخطأت في حقك
وكل غالي عليا هان
الشیطان غواني يا أُمي
وخلاكي في طي النسيان
وبعدني عنك في لحظة
كنت فيها ضعيف غفلان
مكنتش أعرف إنك
أغلى هدية
وصاني بها الرحمن

ولا قدرت قيمتك
وراح مني الطريق والعنوان
عشان كده بقولك
سامحيني أنا الغلطان
حقك عليا
سامحيني على كل اللي عملته
والله أنا ندمان
ولو مش هترضى عني ياما
هفضل سجين بين القضبان
مش هشوف نور الدنيا
إلا أما تقولي سامحتك
وأسمعها باللسان
سامحيني ياما سامحيني

زعلك دا والله على عيني
غضبك عليا منع رزقي
وسلط عليا الوحوش
والدنيا عمالة تشيل وتحط فيا
محمد قادر عني يحوش
والي فرق بيني وبينك
أنا خلاص معرفهوش
أنا عرفت قيمتك ومن غيرك
مش هقدر أعيش
ومن هنا ورايح هكون طوعك
وفي الدنيا غيرك مليش
دا أنا رزقي بيحي برضاكي
وبغضبك عليا مبيجيش

أمي تتخلع روجي من صدري
ولا أشوف في عنيك دموع
ده أنا يوم ميلادي قلبك
كان يرقص وإيديكي لي الشموع
وشربت منك الحنية
وكنتي للحنان ينبوع
ده أنتي لما بتغضي عليا
بتتخفق روجي بين الضلوع

مهما يطول

مهما يطول الليل
لا بد ييجي الصباح
مهما يطول الصبر
أكيد بعده نجاح
مهما الحزن يكون
بعده تيجي الأفراح
مهما تكون في أزمة
الحب يداوي الجراح
المكتوب علينا حاشوفه
مهما كان البكا والنواح
ومخيطى ثابتة هانمشي

وإن كانت السفن عكس الرياح

والوصول للقمة صعب

محتاج قصة كفاح

نتحلى فيها بالصبر

نوصل للصلاح والفلاح

والأبواب المغلقة تتفتح

بالحكمة من غير مفتاح

ونأخذ من ماضينا عبرة

وما نبكيش على الي راح

نتحلى بأخلاق عالية

كل شي يبقى متاح

وما نبصش لي في أيد غيرنا

ويكون لنا غير مباح

ونجدد في أفكارنا
ونجعل من العلم والدين سلاح
هانقوم من عز نومنا
نلاقي النور جه والصبح
والليل عدى وولى
وراحت معاه كل الجراح

ابدأ يومك بسم الله

ابدأ يومك بسم الله

وتوكل عليه

خليك متفائل

حب الناس..

قرب منهم..

وما تخلي شيء

بينك وبينهم

تلقى الخير جه على بابك

واتحلت كل المسائل

جمع أهلك وقرايبك

جمع بأيديك كل الشوائب

فتح مخك كبر عقلك
مهما يكون خليك عاقل
اكظم غيظك
شيل نفسك ماتكونش
على غيرك عائل
اتحدى الصعب والمستحيل
وواجه كل المشاكل

أم الشهيد

يا أم الشهيد قومي انهضي
للملي الجراح
لأجل ما تهدأ عيونه
وفي الجنة ينام مرتاح
يا أم البطل الي دافع عن وطنه
بصدره ومن غير سلاح
يا أم الفدائي الي زاح
بأيده ضلام الليل
وبدا مشوار الكفاح
وسجل يا تاريخ عن أم
كتبت بإيد شهيدها قصة نجاح

واحكي للأجيال الي جاية
عن عصر التنوير والصلاح
واضرب بيهم المثل في الكتب
واضرب تعظيم سلام
لكل الشهداء الي ارتوت
أرض مصر بدمهم
لجل ما يعود السلام
مهما قولنا ومهما عدنا
ما يوفهوش حقهم
ولا يكفيهم مليون كلام
صورهم حاتفضل عايشة
أُدام عينا في اليقظة والمنام
همَ الي بيهم سطعت شمس الحرية

وراح الغيام
والحلم أصبح حقيقة
سجل يا تاريخ
واضرب للشهدا تعظيم سلام

جميلة الجميلات

ياما قالوا الناس عنك

وغنوا لك ..

يا أطف الكائنات

شامخه أبية بأخلاقك

اتحليتي بأجمل صفات

واثقه من نفسك وقدراتك

وعندك تأكيد للذات

بابا وماما راضين عنك

وبيدعوا لك في الصلوات

متواصلة مع أحبابك

وزمايلك كمان شهدوا لك

بالنجاح والانجازات
والمدرسة وضعت ليكي وردة
جوة شجرة المتفوقات
وسامتك وطبعك الهادي
كانوا ليكي علامات
وحبك لزميلاتك
اتكتبتك في الرسائل
وخفة ظلك وقبولك
خلوكي من الملكات
وبجهدك وبإصرارك
بكرة تكوني ست المجتمعات
المستقبل أودامك كله
مليان بشرى وإشراقات

بتبشر وتقول إنك
حاثققي المعجزات
بحكمة عقلك
ورجاجة فكرك
الي فاقت كل التخيالات
بدعيلك لك
من كل قلبي
مع خالص الأمنيات
يرضى عنك ربنا
وتكوني صلبة وقوية
في مواجهة التحديات

مش عاوزة أفتكرك تاني

إن مریت فی طریق مشینا فیه

حاعمل نفسي مش فاکراه

وإن عینک جت فی عینی

صدفة حأقول ده سراب

ویاما جریت وراه

بس یارب ما أحن له تانی

ولا أقول.....

ده کان حب وبتمناه

ولا أستنی یمر طیفک

ولا أقول یاما کنت بستناه

ویقدر قلبي ینسی جرحک

ويقاوم شوقه وهواه
ومهما أخذني الشوق إليك
برضوها أقدر أنساه
ومش حاصدق ثاني كلامك
وحاصدق الي عيني شيفاه
عشان غدرك بيا جرحني
وخلي قلبي يعيش مأساة
ولو كان بإيدي
آداوي جرح قلبي
وأرجع ثاني
أعيش في هناه

مش شايفة غيرك

كل العيون عليا
شيفاهم وشايفني
إلا عيون حبيبي
ديماً بعيد عني
يا هوى روح
وقوله وحشتني
يبعتلي جواب ويطمني
ده مهما البعاد يطول
شوقي إليه بيزيد
هو بس الي شاغلني
نفسي أطمئن عيني وقلبي

وأعرف..

هو ناسيني ولا فاكرني؟؟

وهيفضل لحد إمتي

سايبني في ناري وحيرتي

وهو هناك بعيد

عائش ومتهني

يوعد يقول أنا جاي

ويينسى معادي ويسبني

بشوقي واقف مستني

متصنع الود

اللي يجبك ..

هايجبك

مهما تكون

أوعى تصدق

متصنع الود

إنه في يوم

لودك يصون

يبان قدامك متيم

وبشخصيتك مفتون

ومن ورا ظهرك
طوفان بركان بيغلي
أقوى من الفيروس
وأخطر م الطاعون

فين أيامك يا أمي

وقولت أهرب وأسافر

يمكن ياما أنساكي

لاقيت الفكر ملازمي

وروحى راحت معاكي

قولت أناام يمكن

النوم ياخذني بعيد

لاقيتك جايا لي في منامي

سامعة دعوتك ليا

يا بنتي الله يراكي

قولت أصحى أدور

على حاجة تشغلني

لقت صورتك
وبعيني وقلبي شايفاي
حيني إليكي بقتلني
هاتفلي ديماً بقلبي
ولأأي شيء عنك ..
تاني هاشغلني

العيد لأصحابه

ولما قالوا العيد قرب

قولت كان على عيني

ياريت

مافتكرش حافرح به تاني

زي السنين الي فاتت

لما كانت الشموع منورة البيت

كنت بنسى أحزاني شوية

وحبايي الي ياما عليهم بكيت

لكن منين الفرح يزورني

وأنا من حنانهم مارتويت

تيجي ياعيد تروح ياعيد

زي ماروحت زي ماجيت

الحلم مش بعيد

أنا هافضل أحلم
طول ما أنا عايش
عمر حلمي ما حيموت
أصل أنا عايش
عشان أحقق أحلامي
وصداها يدوي في الملكوت
بعشق كلامي ورسايلي
وأكره موت السكوت
أهون عليا أموت كالنسر
ولأأكنش يوم خيط عنكبوت

بحور الوهم

في بحور الوهم
أنا ببحر من غير مجداف
أتلقي الموج بصدري
عمري ما أنخي أو أخاف
حبايب عمري باعوني
ويا ما شيلتهم ع الراس
كنت بطلعها من فمي
وأنا عيشتي كانت كفاف
الخسة وقلة الأصل
في دمهم

علموني دروس

قطعوا فيا الأنفاس

وعشان خاطر عيونهم

قررت الاعتزال والاعتكاف

إيدنا في إيد بعضينا

إيدنا في إيد بعضينا
لسة مشوارنا طويل
وقاموس المصريين
مايعرفش كلمة مستحيل
وحياة المساجد والكنائس
الي منورة ليلاقي بالقناديل
لنقدم روحنا فداكي يا مصر
مش هتاف ولا شعارات ولا تمثيل
يا أم الهرم يا أم النيل
بحق القرآن والتوراة والإنجيل
لنرفع شعار بحبك يا بلدي

من كل قلوبنا
ووحدة صفوفنا خير دليل
بحق الشهيد الي راح
شايل روحه بين كفوفه
لنحمي حماكي يا مصر
الي راح ده قبل ما يرحل
قرر وموت خوفه
صلب حيله عشان
يحمي أراضيك
زي الأسد اتلقى الرصاص
لجل ما يحابي عليك
غدر الجبان سليط اللسان

فاكر نفسه بيحيي الأوطان
عديم الإيمان خسيس وجبان
بعملية واحدة فروا وهربوا
كما الفئران

السيرة الذاتية

نجاح علي

موجه تربية نفسية بإدارة الخانكة التعليمية

ليسانس آداب قسم علم نفس

دبلومة تربوي

كاتبة بالعامية والفصحى

مؤسس صالون نجاح الثقافي

رئيس نادي ادب بيت ثقافة الخانكة

متزوجة من أستاذ دكتور

ولديها ولدين مهندسين وطالبة جامعية

عضو مؤسس بجروب أهل الخانكة خيرهم للناس أنفعهم للناس

محتويات الكتاب

5	إهداء
6	المقدمة
7	مات الإحساس
8	دموع
9	خاتم في صباغك
11	كان فاكراً
12	فاكرني
13	المسامح كريم
15	الدم بقي مية
19	ساعة المصالح
21	سابق في دلالة
22	كفة الميزان
24	لاوي بوزة
25	بين ايديك
27	آخر كلام

29	حظي معاك
31	وأنت جنبي
34	وصلني سلامك
36	أيه الي حصل
38	خيرنا عليهم
40	متهم برئ
43	أيام زمان
46	أمانه عليك يابكرة
48	من يوم ماقابلتك
50	مش هتنازل تاني
52	العوازل
54	أنت ليه؟؟
56	كنت فاكراك
59	خلص الكلام
61	أمل
62	اشغل نفسك بنفسك
64	ليه الناس

65	ساعات نحس بالفرح
66	العمر عدى
67	السلام عليهم
69	دعوة للتفاؤل
71	دموع حزينة
73	دموع الندم
77	مهما يطول
80	أبدأ يومك باسم الله
82	أم الشهيد
85	جميلة الجيالات
88	مش عاوزه افتكرك تاني
90	مش شايفه غيرك
92	متصنع الود
94	فين أيامك يا أمي
96	العيد لأصحابه
98	الحلم مش بعيد
99	بحور الوهم

101	إيدنا في إيد بعضينا
104	السيرة الذاتية
105	محتويات الكتاب

ثم نحمد الله

أزمة مشاعر

نصوص عامية

نجاح علي



الطبعة الأولى

1442 هـ - 2020 م

دار ديوان العرب للنشر والتوزيع

مصر - بورسعيد

جوال: 00201211132879

E-mail: mohamedhamdy217217@gmail.com